

霍

亂

論

霍亂論序

家兄柳吟善譚醫而極折服於武林王君孟英丁酉冬予始得而見之果奇人也遂相莫逆嘗語予曰天以五運六氣化生萬類而人或因此以致疾者是天地之氣亦有時而偏也故神農氏播穀之餘卽嘗藥性有熊氏垂裳之際特著方書雖曰開物成務之事實寓補偏救弊之心輔相兩閒原非小道能紹其統者唯漢季張仲景一人而已所著傷寒金匱二書集諸氏之大成爲萬世之模楷俾後賢得以各抽其緒而尙論之如河閒論三焦戴人論三法明之論升陽丹溪論滋陰喻氏論秋燥吳氏

論瘟疫張鳳達論暑郭右陶論痧皆具有卓識而自成一家者也予聞而韙之今孟英復出所述霍亂論示予蓋因年來是症流行而治無善法乃特摭其蘊藉經綸之學發爲補偏救弊之言引古證今述而不作辨訛別異義已無餘功駕前賢志希古聖此日之道行千里將來之名數一家皆於孟英無慙焉爰述其言以爲序

時

道光十八年戊戌閏四月

楊進士出身

調授奉政大夫浙江溫台玉環餉捕同知加一級前翰林院庶吉  
士愚弟海豐張洵拜書

[illegible]

武林王孟英先生抱倜儻之才精軒岐之學年未冠遊長山卽以良醫聞迄今十餘年來車轍千里計指下所生全蓋不知若干人矣然視疾之外足不輕出戶手未嘗釋卷此其好學深思誠有人所不能及者故能洞徹病情而投劑多效也如近行時疫俗有稱爲弔腳痧一證古書未載舉世謂爲奇病紛紛影射天札實多賴先生大聲疾呼曰此卽霍亂轉筋之候也嗚呼先生其先覺者乎一言喝破堪回大地之春乃猶慮沉迷者之未盡覺也慨然作霍亂論一書鑄古鎔今闡經斥異其有功於世人所共知矣至先生之爲人尤世之罕覯恂恂然不趨乎

時不戾乎時望之可畏卽之可親凡從而遊者皆欽愛不忍離  
今予得與合併甫數月而先生遽爾言歸再圖把臂其在何  
時悵然久之因索其將鏤之藁一讀而叙此數言以誌送別之  
依依卽世之得讀是書者亦可因此而想見其爲人

道光十有八年夏五月澱水諸葛令竹泉氏題於環山之挹翠  
軒

自序

霍亂急證也霍亂而轉筋則證之尤急者也然內經發其論先  
哲著其方矣奈往往有惑於弔腳痧之名而駭爲奇特之病目  
眩心疑妄施治療抑何陋哉夫弔腳痧俗稱也以其上吐下利  
之後筋轉於腓而動掣與呼乾霍亂爲絞腸痧同其比喻耳有  
指鹿爲馬而好爲大言以欺人者開口傷寒論動手四逆湯鹵  
莽滅裂似是而非更可歎矣若傷寒論乃金科玉律之書不得  
草草讀過者觀其論霍亂首以熱多寒多分治是霍亂原有陰  
陽之殊也但五苓散外何竟無一言以及熱證之治豈聖人垂



訓亦爾偏疎蓋由書傳兵火之餘難免遺亡之憾因此識彼在學者之自得焉矧四逆湯條於既吐且利之下緊接曰小便復利重申曰下利清穀是何如其叮嚀而瞻顧耶苟不識此而徑敢妄援其例以誤人者不得藉口聖人而自卸其罪也且是證也每發於夏秋之間甚則流行似疫闔境皆然謂非暑溼熱三氣之所釀抑何至於此極乎其閒亦有陰寒之證者皆是安逸之人有自取之道不可因此而概彼也故雄謂霍亂之屬熱者主病之常也眾之所同也霍亂之屬寒者他氣之逆也人之所獨也憫世人之惑於俗誣於古而未明夫常變之道也因述其

大略參以其貌而質之大方云爾

道光戊戌春三月上澣武林王士雄孟英書於天台道中

亂論

自序

三

霍亂論例言

一是書以內經傷寒論爲宗旨義有未備者采守眞鳳達等書以補之至一切偏談激論概不泛引以滋眩惑

一弔腳痧卽霍亂之劇而轉筋者原非另有一證也然初立此名不過因其病狀而呼之孰知流行旣盛互相傳訛遂失其本來之眞而以爲奇異之病夫好立名目惑人聽聞他事且不可况醫道有關性命哉伊誰生此厲階天枉不可勝數今取素靈傷寒金匱之文而發明之采昔賢論說治案以辨證之名曰霍亂論蓋欲世人之豁然心目也

一 乾霍亂俗呼絞腸痧由來久矣第古書皆無專條茲采郭氏論及張氏說以廣之然古人未聞有惑於絞腸痧之名而失乾霍亂之治者奈今人一聞弔腳之說遂茫然無措而不知其卽是轉筋霍亂何古今人相去之太遠耶可慨也已

一 采古案所以明其治之有據也綴以拙注所以廣其案之有法也附錄俚案所以實其法之有徵也或有未善就正宗工

一 霍亂雖非小證然偶合古法竟可不藥如飲水單方刮刺

之類皆是集中備載不遺庶僻壞征途咸得按書救療及其藥也允非粗工可辨故所列古方特不註分卽來復丹等暨善後諸方並略而不錄冀醫者求其奧而悟其微未可執一定之成方以應無窮之活病也

霍亂論

例言

霍亂論目次

上卷

張序

諸葛序

自序

例言

總義

發明內經二條

發明傷寒論二條



熱證治例

發明內經二條

發明傷寒論一條

引釋原病式一條

引釋治暑全書一條

發明金匱書一條

引釋痧脹玉衡一條

寒證治例

發明內經一條

發明傷寒論四條

附傷寒少陰吐利二條

下卷

引釋古案九則

附錄俚案十則

列方

跋



霍亂論

武林王士雄孟英述

總義

素問六元正紀大論云太陰所至爲中滿霍亂吐下太陰溼土之氣內應於脾中滿霍亂吐下皆中焦溼邪爲病第土無定氣分寄於四季又唯夏季爲獨旺蓋大暑至秋分六十日是太陰司令恰與君相二火合化喻氏以三氣同推允爲卓見故太陰所至亦不必拘定司天在泉而論也如霍亂一病每發於夏秋之間者正以溼土司氣而從熱化耳若其中陽

霍亂論

卷上

脾○陽○素○屬○土○則○運○化○之○不○多○陽○入○之○運○實○為○變○身○素○餒○本○已○土○不○勝○溼○而○復○襲○涼○飲○冷○則○溼○從○寒○化○而○成○霍○亂○非○寒○屬○天○運○之○自○然○也○

者亦有之然熱化者天運之自然寒化者他氣之所逆知常知變庶可以治霍亂焉

靈樞經脈篇云足太陰厥氣上逆則霍亂

足太陰脾土臟也其應在溼其性喜燥鎮中樞而主升降濁之司唯溼大盛而滯其升降之機則濁反厥逆於上清反抑陷於下而為霍亂雖有熱化寒化之分必以治中焦之溼為要領也

傷寒論云問曰病有霍亂者何答曰嘔吐而利名曰霍亂

此設爲問答。以明霍亂之病。謂邪在上者多吐。邪在下者多利。邪在中焦。上逆而爲嘔吐。復下注而利者。則爲霍亂。霍亂者。揮霍悶亂。成於頃刻。變動不安之謂也。若上不能納。下不能禁之久病。但名吐利。不得謂之霍亂也。

又云霍亂頭痛發熱。身疼痛。熱多欲飲水者。五苓散主之。寒多不用水者。理中丸主之。

霍亂該吐下而言。頭痛發熱。身疼痛。則霍亂之表證也。而有寒熱之分者。以中焦土位。乃陰陽之交。而無一定之性。從陰化則爲寒。每因寒涼而病。始發冬月多有之。從陽化則爲熱。

因暑熱而病始發。夏秋多有之。然因寒者。口必不渴。稍渴者。者必屬於熱。仲景又云。下利欲飲水者。以有熱故也。故寒熱二證。卽在此辨。五苓散去水。以泄熱。理中丸煥土以祛寒。雄推此例。分列熱證寒證於左。冀醫者判別陰陽。庶不倒行逆施。而蹈絕人長命之戒。

熱證

素問六元正紀大論云。土鬱之發。爲嘔吐霍亂。

諸鬱之發。必從熱化。土鬱者。中焦溼盛而升降之機。乃窒其發也。每因吸受暑穢。或飲食停滯。遂至清濁相干。亂於腸胃。而爲上吐下瀉。治法如平胃散。能宣土鬱而分陰陽。連樸飲能祛暑穢而行食滯。若驟傷飽食。而脘脹脈滑。或脈來濡數。模糊胸口。按之則痛者。雖吐猶當以鹽湯探吐。吐盡其食。然後以黃芩加半夏湯致和湯之類調之。

又云。不遠熱則熱。至熱至則身熱。吐下霍亂。



此明指霍亂有因熱而成者。奈病源三因等書咸謂霍亂無不本之風冷。遂致薛立齋張介賓輩專主於寒。印定後人眼目。凡患熱霍亂者皆爲此數公殺之矣。且不遠熱三字。亦非但以藥食爲言。如勞役於長途田野之間。則暑邪自外而入矣。宜白虎湯六一散之類。甘寒以清之。或安享乎醇酒膏粱之奉。則溼熱自內而生矣。宜梔豉湯黃芩加半夏湯連樸飲之類。苦辛以泄之。其有暑入傷元。白虎湯可以加參氣虛招暑用參朮必佐清邪。昔賢成法自可比例而施。奈昧者妄謂勞傷之病宜補。膏粱之體必虛。不察其常。侈談其變。信手溫

熱動輒殘生。良由讀書不明理。反爲書所蔽。欺已欺人。彼自  
不覺耳。

傷寒論云。問曰。病發熱頭痛身疼。惡寒吐利者。此屬何病。答曰。  
此名霍亂。自吐下。又利止。復更發熱也。

霍亂之病。雖由內蘊溼熱。而然。但既有發熱頭痛身疼惡寒  
之表證。則治法必當兼理其表。此仲聖主五苓散之意也。然  
表證又當分別。如吸受風暑之邪。而兼煩躁面垢齒燥者。宜  
平胃去朮加梔豉竹葉薄荷木瓜扁豆之類。唯感冒風涼之  
邪者。宜五苓散。若兼冷食停滯。而寒熱似瘧者。宜十味香薷

飲加減或六和湯之類。若挾痰飲而兼眩暈者。霍香正氣散加減。蓋內蘊之邪。每因外觸之氣而發也。亦有暑暘直侵脾胃。與內邪相協爲虐。迨裏氣和而吐利止。則邪復還之表。而爲發熱者。駕輕湯主之。寒霍亂後表不解者。有仲聖之桂枝法在。

劉守真曰。三焦爲水穀傳化之道路。熱氣甚則傳化失常而吐利霍亂。火性躁動故也。

此守真釋內經吐下霍亂屬熱之文也。按嘉言云。內經病機十九條。叙熱病獨多。賴河閒逐病分詳明晰。所以後世宗之。

故原病式不可不讀也。夫以著陰病論之喻氏猶且折服如是其斷非一偏之見可知矣。故徐洄溪有寒霍亂百不得一之說。然不可謂竟無也。閒亦有焉。要在臨證深加詳審耳。乃薛立齋之流未窺至理。敢以寒多立論。豈非甘獲罪於先賢。妄貽殃於後世耶。

張鳳達曰。暑氣入腹。惡心腹痛。上吐下瀉。瀉如水注。

春分以後。秋分以前。少陽相火。少陰君火。太陰溼土。三氣合。行其政。故天之熱氣下地。之溼氣上人。在氣交之中。受其蒸。浮之氣由口鼻入。而擾其中。遂致升降失司。清濁不分。所瀉。

者○皆○五○臟○之○津○液○急○宜○止○之○然○止○非○通○因○塞○用○之○謂○也○溼○甚○者○胃○苓○湯○分○利○陰○陽○暑○亦○自○去○熱○甚○者○桂○苓○甘○露○飲○清○其○暑○火○溼○亦○潛○消○若○火○甚○之○體○內○本○無○溼○而○但○吸○受○暑○邪○者○白○虎○湯○之○類○宜○之○蓋○臟○性○有○陰○陽○之○別○陰○虛○者○火○旺○雖○病○發○之○時○適○犯○生○冷○而○橘○朴○等○僅○宜○暫○用○陽○虛○者○溼○勝○雖○寒○潤○之○品○非○其所○宜○如○胃○苓○湯○已○爲○合○法○縱○或○體○氣○極○弱○亦○不○過○補○氣○清○邪○並○用○若○因○其○素○秉○之○虛○而○忘○其○現○病○之○暑○進○以○丁○附○薑○桂○之○劑○真○殺○人○不○轉○睫○矣○且○傷○暑○霍○亂○有○身○熱○煩○渴○氣○粗○喘○悶○而○兼○厥○逆○躁○擾○者○慎○勿○認○作○陰○證○但○察○其○小○便○必○黃○赤○舌○苔○

必粘膩或白厚。宜然照湯澄冷服。一劑卽現熱象。此時若投  
薑附藥。轉見渾身青紫而死矣。甚有手足厥冷。少氣。唇面爪  
甲皆青。腹痛自汗。六脈俱伏。而察其吐出酸穢。瀉下臭惡。便  
溺黃赤者。是熱伏厥陰也。熱極似陰。急作地漿水煎竹葉石  
膏湯服之。又有吐瀉後身冷如冰。脈沉欲絕。湯藥不下。或發  
噦。亦是熱伏於內。醫不能察。投藥稍溫。愈服愈吐。驗其口渴。  
以涼水與之。卽止。後以鴛輕湯投之。脈漸出者生。然暑之爲  
病。傷之驟者則發之暴。傷之漸者則發之緩。故九月時候。猶  
多伏暑霍亂之證。醫者不可不知。

金匱云轉筋之爲病其人臂腳直脈上下行微絃轉筋入腹者雞矢白散主之。

尤在涇曰肝主筋上應風木肝病生風則爲轉筋其人臂腳直脈上下行微絃經云諸暴強直皆屬於風也轉筋入腹者脾土虛而肝木乘之也雞爲木畜其矢微寒而能祛風溼以利脾氣故取以治是病焉。雄按薛一瓢以轉筋與瘕證同推義亦本此

原病式云轉反戾也熱氣燥燥於筋則攣戾而痛火主燔灼躁動故也或以爲寒客於筋者誤也蓋寒主收引然止爲厥逆禁固屈伸不利安得爲轉也所謂轉者動也陽動陰靜熱

證明矣。夫轉筋者，多由熱甚霍亂吐利所致。以脾胃土衰，則肝木自盛而熱燥於筋，故轉筋也。夫發渴則爲熱，凡霍亂轉筋而不渴者，未之有也。

張路玉曰：嘔吐泄瀉者，溼土之變也；轉筋者，風木之變也。溼土爲風木所尅，則爲霍亂轉筋。平胃散加木瓜主之，有一毫口渴，卽是伏熱種種燥熱之藥，悞服卽死。雖五苓散之桂亦宜酌用。雄按張君此言可謂先獲我心矣。蓋仲聖雖立熱多欲飲水者五苓散主之之法，然上文有頭痛惡寒之表證，所以仍取兩解之義，是桂枝原爲兼有風寒者而設，倘雖兼表

○證○數○古○人○用○盡○之○事○是○其○理○也○



證○而○非○風○寒○之○邪○或○本○無○表○證○而○內○熱○甚○者○豈○可○拘○泥○成○法○  
不○知○變○通○而○徒○藉○聖○人○爲○口○實○哉○凡○霍○亂○轉○筋○脈○必○兼○絃○正○  
以○木○旺○而○侮○其○所○勝○也○溼○盛○者○平○胃○散○加○木○瓜○可○矣○火○盛○者○  
木○瓜○湯○送○左○金○丸○爲○宜○雄○又○因○雞○矢○白○散○之○意○而○立○蠶○矢○湯○  
一○方○屢○收○奇○績○方○案○附○後○

郭○右○陶○曰○先○吐○瀉○而○心○腹○絞○痛○者○從○穢○氣○而○發○者○多○先○心○腹○絞○  
痛○而○吐○瀉○者○從○暑○氣○而○發○者○多○然○吐○瀉○之○霍○亂○乃○暑○穢○傷○人○氣○  
分○宜○用○油○鹽○刮○其○皮○膚○則○痧○不○內○攻○若○心○胸○脹○悶○腹○中○絞○痛○或○  
如○板○硬○或○如○繩○縛○或○如○筋○弔○或○如○錐○刺○刀○割○雖○痛○極○而○不○吐○瀉○

者名乾霍亂。乃邪已入營。宜以鍼刺出血。則毒有所泄。然後再審其因而藥之。若痧脹已極。難於刮刺者。又必先以藥救醒。乃可以回生。明此三法。庶可十全。

張路玉曰。脾胃喜香燥而惡臭溼。若素多溼滯而犯臭氣。則正氣鬱遏。腹痛乃作。或上連頭額俱痛。或下連腰腿俱痛。有痛死不知人。少閒復蘇者。有腹痛不時上攻水漿不入。數日不已者。甚至欲吐不吐。欲瀉不瀉。或四肢厥逆。面青脈伏。或遍體壯熱。面紫脈堅。但與生黃豆嚼之。覺香甜者是臭毒也。急以燒鹽探吐。或以童便製香附四五錢爲末。停湯頓服最

效。舉世有用水搭肩背及臂者。有以苧麻水溼刮之者。有以  
瓷梳油潤刮之者。有以瓷鋒鍼刺委中出血者。總欲使腠理  
開通之意耳。其脈多伏。或細小緊澀。或堅勁搏指。中帶促結。  
皆是陰逆陽伏之象。不可悞認陰寒而投熱藥。雖砂仁之辛  
溫香竇。亦不可輕用。若見面青脣黑。脈勁搏指。厥逆喘促。多  
不可救也。又有感惡毒異氣之番痧證。卒然昏倒。腹痛。面色  
黑脹。不呼不叫。如不急治。兩三時卽斃。有微發寒熱。腹痛麻  
疹。嘔惡神昏者。或澀澀汗出。或隱隱發斑。此毒邪熾發於表  
也。有發卽瀉利厥逆。腹脹無脈者。此毒邪內伏也。所患最暴。

多有不及見斑而死者。大抵與霍亂相似。初覺卽以苡麥焙  
燥去殼取末三錢。溫湯調服。重者少頃再服。卽安。蓋苡麥能  
鍊腸胃滓穢。降氣寬胸。而治濁滯。爲痧毒之專藥。其毒甚面  
黑者。急砭委中穴。去黑血。以泄毒邪。蓋驟發之病。勿慮其虛。  
非此急奪。束手待斃。倘無苡麥。或服之不應。卽宜理氣爲先。  
如香蘇散。加薄荷荊芥。辛涼透表。次則辟邪爲要。梔子豉湯。  
加牛蒡生甘草。解毒安中。表熱勢甚。清熱爲急。黃芩湯加連  
翹。木通。分利陰陽。斑點深赤。急用芫荽湯下。其血分之毒。如  
見煩擾腹脹。脈來數疾。急投涼膈散。如局方以竹葉易生薑。

則毒從下奪。熱劇神昏。雖合三黃。多不可救。煩渴引飲。遺尿。速清陽明。白虎湯加蔥豉。使毒從表化。以上諸法。在未經誤藥。庶可挽回。一二曾見一商。初到吳會。暢飲酣歌。席閒霎時不安。索生薑湯一啜而逝。又有朔客到楓。覓混澡浴。忽然眩暈。嘔逆到舟。卽斃。且有誤認傷寒而與發散。周身焮紫如雲。而死者。亦有誤認麻疹。而與梔柳櫻桃核湯。咽痛失音而死。者。蓋初起卽昏憤不省。脈多沉匿不顯。或渾渾不清。故辨治最難也。

王晉三曰。痧者寒熱之溼氣。皆可以爲患。或四時寒溼凝滯。

於脈絡或夏月溼熱鬱遏於經隧或鼻聞臭氣而阻逆經氣  
或內因停積而壅塞府氣則胃脘氣逆皆能脹滿作痛甚至  
昏憤欲死西北人以楊柳枝蘸熱水鞭其腹謂之打寒痧東  
南人以油碗或油線括其胸背手足內脰謂之刮痧以碗鋒  
及扁鍼刺舌下指尖及曲池委中出血謂之鉤痧更服玉樞  
丹以治其內是皆內外達竅以泄其氣則氣血得以循度而  
行其脹卽已實卽霍亂耳非另有痧邪也

雄按方書從無痧證之名唯乾霍亂有俗呼絞腸痧者是世  
俗之有痧殆不知起於何時也至醫說始載葉氏用蠶退紙

治痧之法。而江民瑩誤爲解。依證雖爲杭堇浦所譏。然亦可見從前痧證不多。故古人皆略而不詳也。迨國初時。其病漸盛。自北而南。所以又有滿洲病與霍痧之名。右陶因龔雲林青筋之說。而著痧脹玉衡一書。推原極變。其說甚辨。而痧之證治。乃備。路玉復分臭毒霍痧爲二者。蓋謂惡氣更毒於穢氣也。晉三又辨痧卽外邪驟入。阻塞其正氣流行之道。之謂。而痧之病義益明。至情志多鬱之人。稍犯涼熱。卽能成痧。且不時舉發。亦由氣血失其宣暢也。郭氏雖有截痧方。而用藥殊乖。江氏以香附、芩、梔、撫芎爲劑。最爲合法。若乾霍亂之

治雖探吐刮背爲妙。然有不因痰溼飲食之滯。但爲暑暍之氣。擾亂於中者。又當以新汲水地漿等治之。其尋常痧證。及種種不同之痧。與霍亂相殊者。玉衡書具在。茲不多贅。



# 寒證

素問氣交變大論云。歲土不及。民病飧泄霍亂。

歲土不及。則脾胃素虛之人。因天運而更見其虛。中陽既虛。寒溼自盛。以致朝食暮瀉。而爲飧泄。甚加嘔吐。而爲霍亂。觀其與飧泄並稱。則知利者必是清穀。而非臭穢。吐者亦必澄澈。而非酸濁。小便之利。口之不渴。又從而可必矣。如此纔是寒溼霍亂。可以理中湯之類治之。故讀書須以意逆其理。自然觸處洞然。無往而不貫矣。且寒霍亂多見於安逸之人。以其深居靜處。陽氣不伸。加以坐臥風涼。起居任意。冰瓜水果。

恣食爲常。雖在盛夏之時。原不可謂之暑病。王安道論之詳矣。輕則藿香正氣散。或平胃加木香。藿香生薑半夏之類。溼盛而四肢重著。骨節煩疼者。胃苓湯加木香。藿香。大腹皮之類。七情鬱結。寒食停滯者。七香飲。頭疼惡寒無汗者。以香薷飲先解其表。隨以大順散等調其裏。如果脈弱。陽虛。腹痛喜得溫。按瀉出不臭者。來復丹。若吐瀉不止。元氣耗散。或水粒不入。或口渴喜冷而不多飲。或惡寒戰慄。手足逆冷。或煩熱發躁。揭去衣被。但察其瀉出不臭者。乃內虛陰盛。格陽宜理中湯。甚則四逆湯加食鹽少許。更有暴瀉如水。冷汗四逆。脈

弱不能言者。急進漿水散救之。並宜冷服。然此輩實由避暑而反爲寒傷致病。若誤投清暑之劑。而更助其陰。則頃刻亡陽莫挽矣。前人有治此病而愈者。尙未確識其爲寒也。遂謂夏月暑病。通宜溫熱。噫。自己錯認面目。而欲傳信後人。何異癡人說夢耶。

傷寒論云。吐利汗出。發熱惡寒。四肢拘急。手足厥逆者。四逆湯主之。

此陽虛之體。寒邪得以直入。而爲霍亂也。發熱惡寒者。身雖熱而惡寒。身熱爲格陽之假象。惡寒爲虛冷之真諦也。四肢

拘急。手足厥逆者。陽氣衰少。不柔於筋。不溫於四末也。首重汗出者。爲陽有外亡之象。故徑用四逆湯祛其既入之寒。而挽其將去之陽。若止見厥逆惡寒。四肢拘急。脈來沉細絃緊。面如塵土。瀉出不臭。雖屬陰寒。而無汗出之候者。但宜冷香飲子治之。寒主收引。故四肢拘急。乃筋強不能屈伸之謂。與熱證之轉筋迥別。臨診極宜分辨。苟或顛倒誤施。禍成反掌。又云。既吐且利。小便復利。而大汗出。下利清穀。內寒外熱。脈微欲絕者。四逆湯主之。

此亦虛冷霍亂之候。四肢拘急。手足厥逆。虛冷之著於外也。

下利清穀。脈微欲絕。虛冷之著於內也。虛冷甚於內。則反逼其陽於外矣。故其外候每多假熱之象。或煩躁去衣而欲坐地。或面赤喜冷而不欲噦。或脈大虛絰而不任按。是皆元氣耗散。虛陽失守。甚加喘噦。最爲危險。唯四逆湯可以驅內勝之陰而復外散之陽。但小便復利。下利清穀八字。最宜著眼。靈胎所謂一證不具。卽當細審也。倘熱霍亂因暑邪深入而滯其經隧。顯脈細肢寒之假象者。必有溺赤便臭之真諦。臨證慎毋忽焉。

又云吐下已斷。汗出而厥。四肢拘急。脈微欲絕者。通脈四逆加

豬膽汁湯主之。

尤在涇曰。吐下已止。陽氣當復。陰邪當解。乃汗出而厥。四肢拘急。而又脈微欲絕。則陰無退散之期。陽有散亡之象。於法爲較危矣。故於四逆加乾薑一倍。以救欲絕之陽。而又慮溫熱之過。反爲陰氣所拒。而不入。故加豬膽汁之苦寒。以爲嚮導之用。卽內經盛者從之之意也。

又云。吐利止而身痛不休者。當消息和解其外。宜桂枝湯小和之。

吐利止。裏已和也。身痛不休者。表未解也。故須桂枝和解其

外所謂表病裏和。汗之則愈也。但此爲寒霍亂之兼有風寒。表邪者而言熱霍亂後之表不解者。不得妄引此例。雄擬駕輕湯最爲合治。然其意亦不敢出仲聖之範圍也。詳其一日消息。再曰小和之者。蓋以吐利之餘。裏氣已傷。故必消息其可汗而汗之。亦不可大汗而可小和之也。況彼熱霍亂之後。津液尤虛。其可妄施汗法乎。此雄之所以但以輕清爲制也。又云少陰病吐利。手足厥冷。煩躁欲死者。吳茱萸湯主之。少陰病吐利煩躁四逆者死。

裏中少陰吐利交作。陰邪盛極。而陽氣不勝也。然先厥冷而

後煩躁猶有陽欲復而來爭之光故以吳茱萸溫裏散寒人  
參大棗益虛安中爲治也若先煩躁而四逆者陽不勝而將  
絕也故死此二條本少陰中寒非霍亂也然旣明霍亂之治  
不得不列其類證蓋恐後人遇此等病亦以霍亂法施之卽  
仲聖列霍亂於傷寒論之意耳



霍亂論

武林王士雄孟英述

引案

羅謙甫治一蒙古。因食酒肉。瀉乳而患霍亂。從朝至午。精神昏憤。脈皆浮數。暑邪未去。按之無力。所傷之物已出矣。精神昏憤。脈食滯已出。而即以新汲水調桂苓白朮散徐徐服之。妙。隨作正氣亦虛。即以前新汲水調桂苓白朮散徐徐服之。妙。隨作地漿水澄取清者一杯再調服之。妙。尤吐瀉遂止。翌日微煩渴。與錢氏白朮散時時服之而愈。脈證如是。而所傷之物已出。用補正清邪之治。凡虛人受暑而病此者。即以此案為法。不可也。其理中四逆等方。皆治陰寒致病。非治暑也。此等界限不

清亦何足  
以言醫耶

又治提舉公年近八十。六月閒患霍亂吐利昏冒終日不省人  
事。暑邪脈洪。大力一息七八至。火勢大。熱如火。不是氣逆奔。  
事內擾。脈洪。大有。力一息七八至。火勢大。熱如火。不是氣逆奔。  
上足冷如冰。非陽虛也。半身不遂。能主東筋骨。牙關緊急。極。  
使然非。遂以甘露散瀉熱補氣安神。明加茯苓以分陰陽。冰  
中風也。水調灌。漸漸省。事諸證悉去。後慎言語。節飲食。三日以參朮  
調中藥。理正氣。十日後方平復。古之名醫。唯憑脈證而施治。  
氏概以老少膏粱為虛寒之體。而養葵景岳輩承流揚波。釀  
成。藥不識病之世界。豈果救運使然乎。周禹載以立齋為作  
俑。而趙氏之徒。徑  
用多人以殉葬矣。

汪石山治一人年三十餘形瘦弱忽病上吐下瀉水漿不入口者七日自分死矣。未曾服燥熱藥所以猶可不死汪診脈入至而數曰當夏而得是脈暑邪深入也。提舉以八十之年而脈入至此人七斷爲吐瀉不納水穀邪氣自盛也遂以人參白虎湯進半杯。虛良久復進一杯覺稍安。暑盛元傷之治此案可法三服後減去石膏知母而人參漸次加至四五錢黃柏陳皮麥冬等隨所兼病而佐使一月後平復。

一僕夫燕京人縱酒飲食無節病霍亂吐瀉轉筋煩渴幾殆時六七月淋雨晝夜飲簷溜水數升而愈。

千金方云。輕者水瘥。良然良然。古此偶合古方。予目擊其事。

後路途中及六合縣見一人服新汲井水良愈。今之遇熱病而猶禁其飲。

冷水者抑何陋耶。

一人病霍亂欲吐不吐欲瀉不瀉心腹絞痛。故俗謂之絞腸痧。脈之沉

伏如無。痛脈每如是。此乾霍亂也。不吐不瀉故曰乾。急令鹽湯探

吐宿食痰涎。許上竅得開遂瀉但得吐瀉更緊。與六和湯愈。

江篁南治從叔於七月閒得霍亂證吐瀉轉筋足冷多汗囊縮。

一醫以傷寒治之增劇江診之左右寸關皆伏不應。吐下否。

伏尺部極微口渴欲飲冷水。足冷囊縮似屬厥陰口渴亦似少陰引水自救何以辨之曰直

中陰經無轉筋多汗症乃以五苓散與之何不用桂  
若少陰頭有汗則死矣乃以五苓散與之茶也露飲覺稍定

向午猶渴以五苓加麥冬五味滑石投之乃暑熱入於厥陰

故口渴欲飲冷非更以黃連香薷飲冷進一服次早脈稍出

傷寒也故如此治按之無根且人脫形正氣已虛呃忒手足厥冷飲食入口即吐熱伏

未大便稍不禁為炙丹田八九壯囊縮稍舒手足稍溫繼以

理中湯二三服足稍溫此際進以補氣清邪之劑則善矣手

渴猶甚咽疼熱不解時或昏沉乾薑助熱使然可見乃以竹

葉石膏湯額之客投之而愈此案江氏初治原不大錯中開

但宜清補不應用外灸內溫之法幸而不用附子故一見昏  
沉尚可掉頭以蓋愆然亦危矣特采之以為臨證者有所鑒

焉。

江少微治一婦人六月中旬病霍亂吐瀉轉筋一醫投藿香正

氣散

此治藿香飲冷兼寒

加煩躁面赤揭衣臥地

藿香正氣散溫散之

劑也誤施尙爾世之動輒即投附桂者每見下咽即昏沉厥

冷渾身青紫而死醫者猶謂陰盛已極此等大熱之劑尙不

克救再遇此病仍以此法投之至老不悟而死者之冤

竟無從訴此雄之所以述霍亂轉筋之治法爲世告也

江診之脈虛無力身熱引飲此得之傷暑宜辛甘大寒之劑瀉其

火熱以五苓散加滑石石膏吐瀉定再與桂苓甘露飲而愈

暑熱爲病脈多虛微絛細芤遲濡弱乃其本象甚至隱伏不

應指或兩尺絕無皆熱滯經絡上下格拒使然亦有脈因火

煽而反洪大滑數異常者此霍亂所

以無一定之診臨證極宜善察也

張石頑云。一少年新婚。陡然腹痛。必有欲吐不吐。麻脊之番沙。

證其實。即或令飲火酒半杯。而腹痛轉劇。旋增顛脹。身發紅。

點。熱毒得酒愈熾。若不急投。與蘆根汁。善解得吐。痛解復有。

鼻衄。口燥。胸腹略見紅斑。血分。與蘆根汁。善解得吐。痛解復有。

煎慈鼓湯。宣解穢毒惡。仍入童便續續與之。得大吐汗出而。

瘥。

葉天士治一人霍亂後中氣大虛。肝風內動。心中空洞。身痛肢。

浮。與異功散加木瓜薑棗。雄按此以培中制木之劑。而為霍。

亂善後之治。最為可法。若見身痛肢浮。而誤用表散之品。則。

內風愈動。脾土重傷。因而致殆者多矣。夫霍亂雖是中焦土病。然土病木必侮。故治寒霍亂亦必首察其厥陰之動靜。倘其人肝陰素虧。內風暗動者。薑附等極宜慎用。卽當用者亦須妥爲駕馭。毋使過劑。若率投無節。雖不似熱霍亂之立時殞命。亦必增劇而纏綿難愈。試觀仲聖治厥陰下利之用白頭翁湯。其義自明。蓋厥陰雖當兩陰交盡。而具合晦朔之理。陰之初盡。卽陽之初生。其本陰。其標熱。其體木。其用火。是以獨稱剛臟。而爵以將軍也。顧名思義。可以悟其治矣。世有治肝氣。惟崇剛燥者。驟則變痙厥。緩則成關格。人但知病之日



深而不知藥之所釀。併改之以爲醫家病家兩鑒焉。

### 附案

孟英治一鄭翁。年六十餘。於七月閒患霍亂。四肢厥逆。周身寒凜。煩悶躁擾。口不甚渴。舉家以爲因寒致病。予察其脈細而伏。苔白而厚。乃暑溼內盛。以燃照湯一服。厥逆寒凜皆退。吐瀉漸止。隨以清理脾胃而愈。

一貴婦年少。體瘦。初秋患霍亂。轉筋。舌絳。目赤。大渴。飲冷。脈左絃強而右滑大。此肝胃之陽素盛而熱復傷營也。以白虎湯加生地。丹皮。木瓜。一劑卽減。再劑而安。丹溪謂轉筋屬血熱。

者此證近是。

丁酉八九月間。吾杭盛行霍亂轉筋之證。有沈氏婦者。夜深患此。繼卽音啞。肢寒比曉。其夫皇皇求于救治。往診其脈。絃細以濇。兩尺如無。口極渴而沾飲卽吐不已。足腓堅硬如石。轉時痛楚欲絕。子乃仿金匱雞矢白散之意。爲處蠶矢湯一方。令以陰陽水煎而涼服。此藥入口。竟得不吐。外以好燒酒令人用力摩擦其轉筋堅硬之處。擦將一時許。其硬塊始漸軟散。而筋乃不轉。吐瀉亦漸減。晡時復與前藥半劑。夜閒居然安寐。次日但覺疲極而已。與致和湯數服。康復如常。後治相

類者多人。悉以是法獲效。唯誤服附子者。最難救療。

陸叟年七十餘。丁酉仲秋。患霍亂。自服丹方。二三日。嘔吐雖已。而利猶不止。且頻頻作噦。聲不甚揚。面赤目閉。小便不通。一醫視之。以爲高年。戴陽證。屬不治。且延已數日。縱投大劑。回陽亦有所不及矣。乃邀予診之。脈雖兩手虛濡。並無脫象。况舌赤而乾。利下臭惡。猶是暑熱內伏。由氣分而擾及於營。慮其絡閉神昏。則難爲力矣。胡可妄議回陽。以速其斃耶。遂以紫雪丹三分。用枇杷葉鮮竹茹省頭草通草丹參連翹桔梗黃芩煎調涼服。次早復診。目開噦止。而小便稍通。仍以前

方加石斛。苡仁。服二劑。利亦減。能進清米飲矣。隨用致和湯十餘帖。竟得全愈。

丁姓者患霍亂。苔色白薄。且不甚渴。但覺口中粘膩而已。彼自知醫欲作寒溼治之。予固爭曰。中焦原有寒溼。所以不渴。然而粘膩。豈非暑入而釀其溼爲熱乎。以五苓加川連。半夏。枇杷葉。與之二帖。霍然。

錢姓者患霍亂。自汗肢冷。脈無。平日貪涼飲冷。人皆謂其寒症。而欲投以大熱之藥。及予視之。苔色雖白。然厚而邊絳。且渴甚。頭大痛。不可因其寒涼致病。而竟不察其內有暑熱之

伏也。於是。以五苓散。加川連。厚朴。木瓜。扁豆。爲劑。服後。脈稍  
出。汗漸收。吐利亦緩。轉方去肉桂。加桂枝。滑石。甘草。頭痛吐  
利皆止。苔色漸黃。隨用清暑和中數帖而愈。

一少年體肥。畏熱。性情驕縱。因酷熱。午閒以蓆鋪地而裸臥。  
其上醒卽飽。啖西瓜數斤。至晚覺頭重惡寒。夜分吐瀉大作。  
四肢拘急。汗冷息微。時時發躁。黎明逆予診之。脈沉弱。遂用  
漿水散。加吳萸。厚樸。投之一劑而安。次與厚樸。生薑。半夏。甘  
草。人參湯數帖而愈。

己丑五月閒。天氣驟熱。家慈陡患霍亂。自汗肢冷。脈微。苔白。腹

大痛欲重按。雄進大劑理中湯。加桂枝白芍一服而病如失。此所謂舍時從症也。

壬辰夏。姊丈李華甫家。多人患疫。于一以清解法治之。獨其孀居在室之老姊。患嘔吐下利。而舌黑如煤。人皆以爲同時之疫。于診之。體豐脈弱。畏寒不渴。顯係寒溼爲病。遂與附子理中湯數帖而愈。迨丁酉深秋。又患吐瀉。適子偶赴舜江。乃延他醫診焉。以爲寒也。已亦憶及壬辰之恙。益信無疑。且日飲薑湯代茗。而吐瀉更甚。漸以致劇。旬日後。子始返杭。視其形已瘦削。面顴聲啞。胸痞口燥。煩躁不眠。脈細如絲。舌赤如赭。

是伏暑也。與大劑梔豉芩連二十餘帖。始獲向安。

甲午秋。金朗然之母。新寡。患疥癩。利過進。苦寒遂成吐利。更醫改投熱補。吐利反甚。而肌肉漸消。月事乃斷。延至未春。杭越諸名家雜治病。造極中之極矣。略進湯飲。隨卽傾吐一空。且洞泄不已。時時自汗。邀子診視。脈細皮寒。五虛證具。然細察左關。隱然有絃出寸口之象。是病雖誤於寒藥。戕中而肝陽素旺。前此每進滋陰。則腸氣愈濡而滑泄必增。稍投燥熱。不但入口卽吐。抑且反有昏冒欲厥之象。予以四君子加蓮肉。陳倉米炒乾薑以溫。其中複川連。吳茱萸。烏梅。肉川椒以和。

其肝十餘帖吐勢漸減服至三十帖始能略受米穀而便猶  
溏乃令將參蓮湯煮飯以資其生氣劑中減萸連加石脂餘  
糧以固其臟氣調至初夏中氣始安但偶觸寒怒則嘔吐必  
至予唯專以培中立法不爲旁言易治而人皆謂吐瀉雖愈  
天癸久阻若不通經必成勞損予曉之曰血化於氣氣資於  
穀今病者胃中久無穀氣血從何處生來必待安穀半年胃  
氣漸立斯血有所化而經自來苟不知此而以破泄之藥強  
通之則內本無阻徒傷其正氣耳繼以黃耆建中去飴加參  
歸羊肉爲丸服至仲冬而形體漸充經期亦至耆術不計凡



服參七八斤。於昇甫收全續。因聯姻婭。故朗然爲子之妹夫焉。此吐利案附載。以廣治例。其脈溢上魚際者。是其稟賦本然。魏玉衡所謂。今人多有此脈。况病者。略無發熱咳嗽。故不必因其新寡而疑爲勞損也。

列方

五苓散

傷寒論

治霍亂吐瀉口渴飲水頭疼身痛發熱者

猪苓

茯苓

澤瀉

朮

桂

右爲末白湯和服

合平胃散名胃苓湯

雄按此仲聖治熱霍亂之兼有風寒表邪之方也然隅反

化裁在人善用。如證與本條適合者方中當用桂枝。若內  
伏暑溼之邪而又過食生冷者方中當用肉桂。其外無風  
寒之表內無飲冷傷中則桂可輕用哉。此石頑之所以示  
戒而河間之所以加三石。吳氏之所以有四苓也。苟能因  
此而引伸其義則無窮活法皆可心領而神悟矣。

白虎湯 傷寒論 治暑火熾盛而霍亂者

石膏

知母

甘草

粳米

右水煎米熟湯成去渣服 雄按治霍亂粳米宜用陳倉者

人參白虎湯 傷寒論 治證如前而元氣已虛者宜此前方加人

參一味

竹葉石膏湯

傷寒論

治體虛受暑霍亂吐瀉及暑邪深入等證

竹葉

石膏

麥冬

人參

半夏

甘草

粳米

右水煎服

治熱極似陰之霍亂用地漿水煎更妙

黃芩加半夏湯

傷寒論

治體虛伏熱之霍亂

黃芩

芍藥

甘草

半夏

生薑

大棗

右水煎服

梔子豉湯 傷寒論 治暑熱霍亂之主劑兼解暑證誤服附桂而

致殆者

梔子

香豉

右水煎服

雄按此傷寒吐劑也。而予治熱霍亂。獨推以爲主劑。蓋梔子苦寒。善泄鬱熱。豉經蒸腐。性極和中。凡霍亂皆由溼鬱化熱。而擾攘於中宮。唯此二物最爲對症良藥。奈昔人咸未之察也。且二物之奇。匪可言罄。如偶以竹葉清暑風。配以薤仁宣穢惡。溼甚者。臣以滑樸熱勝者。佐以芩連。同水

瓜扁豆則和中。合甘草鼠粘而化毒。其有誤投熱藥而致躁亂昏沉者。亦必藉此以爲解救。厥功懋矣。而古今之治霍亂者。從不錄用。豈非一大闕典耶。

雞矢白散

金匱

治轉筋入腹

雞矢白

雄雞矢乃有白蠟月收乾之

葱豉湯

肘後

治乾霍亂發斑

葱白

香豉

水煎和童便服

蘆根湯

千金

治霍亂煩悶

蘆根

麥冬

右水煎服

地漿

千金

治乾霍亂及霍亂轉筋

掘黃土地作坎深三尺以新汲井水沃入攪濁少頃取清  
飲三五盞即愈大忌米湯

羅謙甫曰霍亂乃暑熱內傷七神迷亂所致陰氣靜則神藏  
躁則消亡非至陰之氣不愈坤爲地屬陰土曰靜順地漿作  
於陰地坎中爲陰中之陰能瀉陽中之陽也雄謂得羅氏此  
言治霍亂已思過半矣蔣式玉稱其勤求古訓信不誣也按

霍亂因無形之邪由口鼻吸入肺胃之絡而阻其氣道之流行乃否塞不通之病或清不能升而泄瀉無噤濁不能降而腹痛嘔吐故用藥皆以清涼宣暢爲法凡周時內一口米湯下咽卽脹逆不可救者蓋以穀氣入胃長氣於陽况煎成湯液尤能閉滯經絡也薑湯熱湯飲酒澡浴並忌者爲其能助熱邪上衝也若吐瀉旣多元氣耗散內已無邪者須以清米湯涼飲之以爲接續不可禁之太過而反致胃氣之難復也

柳州方

柳子厚

治乾霍亂不得吐瀉甚至冷汗出而氣欲絕者

鹽

一撮放刀上用火炙透

右以熱童便和服少頃卽得吐下而氣通矣雄按此方極易

極效真神劑也或用新汲水和服亦可

藕汁聖惠方治霍亂吐利

生藕

右搗汁服

木瓜湯聖惠方治霍亂轉筋腹痛

木瓜一兩

右水煎服餘湯浸青布裹其腓本方加桑葉七片尤良  
外臺方用木瓜子根皮合煎湯服



扁豆散 普濟方 治霍亂吐利

生扁豆

右爲末入少醋冷水和服 雄按木瓜扁豆皆治霍亂之主藥

也於此二方可見

桂苓甘露飲 河間 治暑熱霍亂之聖劑也

茯苓

肉桂

猪苓

澤瀉

白朮

甘草

滑石

石膏

凝水石

右爲末每服三錢水調下 桂苓白朮散卽本方去猪苓加人參也

六一散

即益元散又名天水散 河間治暑熱霍亂

滑石

甘草

右爲粉水飛每服三錢新汲水下

左金丸 治霍亂轉筋火邪內熾

黃連

吳茱萸

右末之米飲丸梧子大每服三錢以陳木瓜五錢煎湯下此

證因溼盛而風木行脾者石頑主平胃散加木瓜矣若熱

勝而火燥於筋者雄獨推是方爲妙張雨農司馬聞之極

爲首肯云嘗在京師見杜石樵少宰亦以此藥救活多人

也。然背賢皆未采用。何左金丸之塞於遇乎。

黃連香薷飲

活人

治暑熱霍亂

黃連

香薷

厚樸

右水煎服

香薷飲

治夏月受風涼有表證之溼霍亂

香薷

厚朴

扁豆

水煎服。若夏月無表證者。切勿誤服香薷。以疎衛氣而招暑患。

十味香薷飲

治虛人伏溼復兼感冒食滯而成霍亂者。宜此

方加減治之

香薷

厚朴

扁豆

人參

黃耆

白朮

茯苓

甘草

木瓜

廣皮

右水煎服

本方去參耆加藿香蘇葉名消暑十全散治夏

月久傷生冷復重感風寒而成霍亂者

藿香正氣散

治內停生冷外感風寒之霍亂亦主水土不服

之病

藿香

桔梗

紫蘇

白芷

厚朴

半夏

茯苓

陳皮

甘草

蒼朮

功本作大腹皮誤

右爲末每服三五錢水煎服

六和湯

治溼熱內伏外冒風涼霍亂吐瀉寒熱交作

香薷

砂仁

藿香

人參

甘草

扁豆

厚朴

木瓜

杏仁

赤苓

半夏

石水煎服

平胃散

局方

治溼熱內甚霍亂吐瀉

蒼朮

厚朴

橘紅

甘草

右爲末每服七錢水煎 加木瓜治轉筋霍亂

救急良方 治暑熱霍亂吐瀉轉筋

新汲水

以一椀冷飲之外以一盆盛水浸兩足忌食熱物

陰陽水

本草綱目 治霍亂吐利

新汲水

百沸湯

右各半和服

李瀕湖曰上焦主紀中焦腐化下焦主出三焦通利陰陽

調和升降周流則臟腑暢達一失其道二氣淆亂濁陰不降清陽不升故發爲霍亂吐利之病飲此卽定者分其陰陽使得其平也

傷暑霍亂方 包肅溪

絲瓜葉一片 白霜梅肉二錢 并核中仁用

右研爛新汲水調服立療

金華露 顧聖符 治霍亂轉筋

扁豆葉一握

右搗絞汁一碗飲

四苓散

瘟疫論

治溼熱霍亂胸悶溺瀉而渴者

茯苓

猪苓

澤瀉

陳皮

右水煎服

雄按吳氏於五苓方去桂而治胃中溼熱最爲

有見且以橘皮易木則無實中之弊而有利氣之功當變而變可謂善用古人之法矣

羌蔚湯

治乾霍亂腹痛驟發深赤斑毒俗呼爲番痧

益母草

右以水濃煎少投生蜜放溫恣服取效或加生蘆薈汁半杯

良



燃照湯

孟英

治暑穢挾溼霍亂吐下脘痞煩渴外顯惡寒肢冷

者

草果仁

一錢

淡豆豉

三錢

炒山梔

二錢

省頭草

一錢五分

製厚朴

一錢

醋炒半夏

一錢

酒黃芩

一錢五分

滑石

四錢

水煎涼服

連朴飲

孟英

治淫熱內伏之霍亂兼能行宿食滌痰涎

川連

一錢

厚朴

二錢

醋炒半夏

一錢

石菖蒲

一錢

淡豆豉

三錢

炒山梔

三錢

水煎服

駕輕湯

孟英

治霍亂後餘邪不清身熱口渴及熱邪內伏身冷

脈沉湯藥不下而發呃者

鮮竹葉

四錢

淡豆豉

三錢

炒山梔

一錢五分

冬桑葉

二錢

金石斛

三錢

生扁豆

四錢

陳木瓜

一錢

省頭草

一錢五分

水煎服

致和湯

孟英

治霍亂後津液不復喉乾舌燥小水短赤

北沙參

四錢

枇杷葉

三錢

鮮竹葉

三錢

生甘草

六分

生扁豆

四錢

陳木瓜

一錢

金石斛

四錢

麥冬

三錢

陳倉米

四錢

右水煎服

蠶矢湯

孟英

治霍亂吐利轉筋腹痛口渴煩躁危急之症

晚蠶砂

三錢

木瓜

三錢

生苡仁

四錢

大豆黃卷

四錢

川連

二錢

醋炒半夏

一錢

酒炒黃芩

一錢

通草

一錢

吳茱萸

六分

炒山梔

二錢

右以陰陽水煎稍涼徐徐服之

冬瓜湯

孟英

治霍亂大渴

冬瓜

去皮瓢

水煮清湯。俟涼。任意飲之。雄按永類鈴方。用陳倉米作湯。今

予改用冬瓜湯其功更勝蓋陳倉米雖能清熱霍亂後用之  
頗爲得宜若邪勢方張吐下未平之際服之猶嫌其守唯冬  
瓜甘淡微涼極清暑溼無論病前病後用以代飲妙不可言  
卽溫熱病用之亦良

### 外治轉筋方

轉筋起於足腓。俗呼腿肚但以好燒酒。摩擦其硬處。軟散卽愈。

一法以省頭草同炒鹽擦之亦良。一法作極鹹鹽湯於槽

中煖漬之。一法以綿絮浸酒中煎滾取出乘熱裹之。一

法以醋煮青布揜腳膝冷復易之。一法男子手挽其陰女

人手揪兩乳。一法令病人偃臥。將膝腕內以手蘸溫水。輕急拍直。待紫紅筋現起。即右陶所用瓷鋒刺出血。立愈。並治乾霍亂。此名委中穴。在膝後對面。

刮法 右陶治霍亂痧脹乾霍亂

背脊頸骨上下及胸前脇肋兩背肩臂用銅錢蘸香油刮之。或用刮舌則子腳蘸香油刮之。頭額腿上用綿紗線或麻綿蘸香油刮之。大小腹軟肉處用食鹽以手擦之。

雄按張會卿曰。凡毒深病急者。非刮背不可。蓋以五臟之系咸附於背也。又須自輕而重。向下刮之。則邪氣亦隨之而

降矣。

刺法 右陶 治乾霍亂痧脹

嘗覽古人遺言。東南卑溼之地。利用砭。今以鍼刺出血。卽用砭之道也。凡霍亂痧脹。邪已入營。必有青筋紫筋。或現於數處。或現於一處。須用銀鍼刺之。去其毒血。然後據證用藥。看其腿溝上下。有細筋深青色。或紫色。或深紅色者。肌膚白嫩者。方有紫紅。卽是痧筋。刺之方有紫黑毒血。其腿上大筋不可刺。刺亦無毒血。反令人心煩腿兩邊硬。筋上筋不可刺。刺之恐令人筋吊。若臂溝筋色亦如此辨之。其餘非親見。不明白。故不具。

載○至如頭頂心一鍼○惟取挑破○略見微血○以洩痧毒之氣○而  
已○不可直刺其指尖刺之太近指甲○雖無大害○當令人頭眩○  
若一應刺法○不過鍼鋒微微入肉○不必深入○

雄

按乾霍亂因毒邪入於營分○周身隧絡爲之壅塞○故又謂  
之痧脹○失治卽死○唯用鍼刺○砭去惡血○取效最捷○益母草蘆  
菔汁之治番痧○皆取其能散惡血也○卽古方探吐以燒鹽和  
熱童便○雖云性專潤下○亦爲其涼血之功有獨擅耳○唯腹雖  
痛極而喜得溫○按脣口刮白者○乃內虛陰寒之病○慎毋誤用  
清涼○妄施鍼刺○而遺人天殃也○

理中丸

傷寒論

治寒霍亂口不渴者

人參

甘草

乾薑

白朮

右爲末蜜丸亦可水煎作湯服合五苓散名理苓湯

附子理中丸

傷寒論

治證如前而寒甚者

前方加附子一味

四逆湯

傷寒論

治陰寒霍亂汗出而四肢拘急小便復利脈微

欲絕而無頭痛口渴者

甘草

乾薑

附子

水煎服



通脈四逆加猪膽汁湯 傷寒論 治陰寒霍亂愈後四肢拘急脈微欲絕者

乾薑

甘草

附子

猪膽汁 和入

水煎服

桂枝湯 傷寒論

治寒霍亂後身猶痛者

桂枝

芍藥

甘草

生薑

大棗

水煎服

厚朴生薑半夏甘草人參湯 傷寒論

治虛寒挾溼之霍亂吐利

藥卽湯見

雄按古今治霍亂者從未論及此方予每用之以奏奇績

故特錄出

吳茱萸湯傷寒論治少陰吐利厥逆煩躁亦治厥陰寒犯陽明  
食穀卽嘔之證

吳茱萸

人參

生薑

大棗

水煎服

漿水散潔古治陰寒霍亂暴瀉如水汗多身冷氣少脈沉或脫

者

桂枝

乾薑

附子

甘草

良薑

右爲末每服三五錢地漿水煎服

大順散

局方

治襲涼飲冷陰寒抑遏陽氣而成霍亂水穀不分

脈沉而緊者

甘草

乾薑

杏仁

桂枝

右炒如法爲末每服二三錢湯和服

冷香飲子

治陰寒霍亂脈沉細或絃緊無汗惡寒面如塵土

四肢厥逆陽氣大虛之證

附子

陳皮

甘草

草果

生薑

水煎一滾卽濾井水浸冷服

七香飲

治七情鬱結寒食停滯而成霍亂者

烏藥

香附

枳殼

厚朴

木香

陳皮

紫蘇

水煎服

神香散

景岳

治乾霍亂腹痛之屬於寒溼凝滯脈絡者

丁香七粒

白豆蔻七粒

右爲末清湯調下小腹痛者加砂仁七粒

王晉三曰此方治寒溼痧脹有神功與益元散治溼熱痧脹可謂鍼鋒相對。

### 灸法 治陰寒霍亂

以鹽填臍內上蓋蒜片安艾炷而灸之。外臺法以手拘

所患腳大母指當腳心急筋上七壯。急筋即屈伸不利而拘急也。喻

氏法凡卒中陰寒厥逆吐瀉色清氣冷凜慄無汗者用葱

一大握以帶繫束切去兩頭留白寸許以一面熨熱安臍

上用熨斗盛炭火熨葱白上面取其熱氣從臍入腹甚者

連熨二三餅。又甚者再用艾炷灸關元氣海各二三十壯。若腠理素疎陰盛逼陽而多汗者用附子乾薑回陽之。不暇尙可熨灼以助其散越乎。

雄按讀仲聖傷寒論。乃知病屬陰虛血少者。概不可灸。必陽虛氣弱者始可用灸。今嘉言復辨陽虛者固可以灸。若陽虛至於外越者。豈容再灸。可謂發前人之未發。足補長沙之未及也。世之不別陰陽而妄施灼灸以傷人者。豈特霍亂爲然乎。吁可嘆已。

附煖臍方

霍亂一症皆由寒邪鬱結氣閉不通因而吐瀉

交作至於多利亡陰血液枯涸則筋脈攣急手足拘牽卽休  
名弔腳痧也此症朝發夕死夕發朝死無論藥力不及卽重  
用猛烈之品而熱劑劫陰終於不救此散藥雖峻猛而由臍  
納入自能溫通臟腑不致傷陰屢試屢驗識者珍之

上去聲貓桂心

捌錢

母丁香

壹兩貳錢

倭琉黃

伍錢

生香附

壹兩捌錢

當門子

肆錢

右藥共研極細末每用三分納入肚臍中外用膏藥封貼一  
時卽愈藥性猛烈斷不可喫孕婦忌用

跋

術數家知天文者也可堪輿家識地理者也而醫之爲道察人病以究乎天地之運氣者也揚子云通天地人謂之儒通天地而不通人謂之伎可見醫非伎比必儒而後可者也柰世之所謂醫者雖天地之常令且不知無怪乎其不識人之病矣如邇年夏秋間所行弔腳痧一證悖人事者未解痧爲何義昧天時者乃謂夏月伏陰雜藥妄治每多夭橫予友孟英王君以通儒而隱於醫獨窺其微爲著霍亂論一編道破病情指陳治法救俗弊於既往甦民困於將來誠通人所未通之書也因慫慂殺青



任其縫校并聞尙有著述未嘗輕以示人然豐城之劍終不久  
埋子雖老矣猶將拭日以俟焉

道光十九年己亥蕤賓同郡謝家柱金堂謹跋